

20/01/1999

BN Sabah sambut baik keputusan Gerakan

KOTA KINABALU, Selasa - Barisan Nasional (BN) Sabah mengalu-alukan keputusan parti Gerakan untuk tidak bertanding dalam pilihan raya negeri Sabah akan datang.

Pengerusi BN Sabah, Tan Sri Bernard Dompok, berkata pihaknya berterima kasih dengan keputusan itu, lagi pun negeri ini memangnya mempunyai banyak parti komponen.

"Ini tentunya suatu berita baik buat kami," katanya ketika ditemui pemberita ketika mengunjungi rumah terbuka Timbalan Ketua Menteri, Datuk Osu Sukam, sempena Aidilfitri di Likas, di sini hari ini.

Beliau berkata tidak banyak perbezaan pendapat di kalangan sembilan parti komponen BN berhubung pengagihan kerusi untuk ditandingi dalam pilihan raya negeri akan datang.

Selain Gerakan, BN Sabah yang ditunjangi Umno turut dianggotai Parti Demokratik Sabah (PDS), Parti Maju Sabah (SAPP), Parti Bersatu Rakyat Sabah (PBRS), Angkatan Keadilan Rakyat (Akar), Parti Liberal Demokratik (LDP), MCA dan MIC.

Kelmarin, Pemangku Pengerusi Gerakan Sabah, Tan Sri Soong Siew Hoong, berkata keputusan partinya untuk tidak bertanding di Sabah sudah disampaikan kepada Pengerusi BN, Datuk Seri Dr Mahathir Mohamad dalam pertemuan di Kuala Lumpur, Sabtu lalu.

Soong bagaimanapun menegaskan Gerakan tetap akan membantu BN Sabah dalam pilihan raya negeri akan datang demi memastikan BN mengekalkan teraju pemerintahan di negeri ini.

Dalam pada itu, Dompok turut mengalu-alukan langkah BN Sarawak menghantar anggota parti komponennya berkempen bagi membantu BN Sabah pada pilihan raya negeri akan datang.

"BN Sabah berterima kasih kepada parti komponen yang tidak sibuk untuk membantu kita kelak," katanya mengulas kenyataan Ketua Menteri Sarawak, Tan Sri Abdul Taib Mahmud berhubung perkara itu, kelmarin.

Ditanya kemungkinan Dewan Undangan Negeri Sabah dibubar selepas sambutan Aidilfitri ini, Dompok berkata: "Hari ini baru hari pertama Aidilfitri...dan Hari Raya Puasa disambut selama sebulan."

Beliau juga berkata BN negeri mengambil kira pandangan semua parti komponen berhubung penetapan tarikh pilihan raya, tetapi pada umumnya tidak timbul perbezaan yang besar.

Sementara itu di Tawau, Ahli Dewan Undangan Negeri (Adun) Merotai, Datuk Abdul Ghapur Salleh, berkata Umno lebih mementingkan rakyat daripada pemimpin dan mereka yang diberi amanah melaksanakan tanggungjawab perlu berkhidmat dengan dedikasi.

"Sesiapa yang dipilih sebagai calon pada pilihan raya akan datang mesti berkhidmat dengan penuh dedikasi kepada rakyat. Jika tidak, tindakan akan diambil termasuk melucutkan jawatan mereka," katanya kepada Berita Harian ketika ditemui di kediamannya di sini hari ini.

"Dalam pilihan raya kali ini, rakyat perlu memastikan calon BN menang dengan majoriti besar," katanya.

(END)